



27. januar 2010

Inatsisartut suleriaasiani § 36 imm. 1 naapertorlugu matumuuna ataani allaqqasoq apeqquteqaat Naalakkersuisunut saqqummiuppara:

Naalakkersuisunut apeqqut:

Ingerlanerliornikooqisumi Puisi A/S-imi aqutsisuni ilaasortat tusaamasat Namminersorlutik oqartussaniik eqqartuussivimmup tunniunneqarnerata kingorna suliaq sumut killippa?

(Inatsisartutuni ilaasortaq Andreas Uldum, Demokraatit)

Tungavilersuut:

Inatsisartut Aningaasaqarnermut Ataatsimiititaliaata 2010-mi aningaasanut inatsisissatut siunnersuummut isumaliutissiissutaanni Naalakkersuisunut kritiseeriinerat ersarippoq, ersarissimmammi Naalakkersuisut Puisi AS-imut Kalaallit nunaata eqqartuussiviani eqqartuussinermut aningaasat atugassaasut aatsaat 2011-mut pilersaarutigineqarsimasut. Aningaasaqarnermut Ataatsimiititaliap kissaatigisimavaa eqqartuussineq 2010-mi aallarnerneqassasoq. Aajunalu Aningaasaqarnermut Ataatsimiititaliap isumalitutissiissutimini allassimasaa:

Puisi pillugu suliat eqqartuussivikkut suliarineqarnissaat suli piffissaliiffigineqarsimanngitsoq Aningaasaqarnermut Ataatsimiititaliap paasivaa. Suliat ingerlanneqarnissaannut siusinnerpaamik 2011-imi aningaasartuuteqarnissaq naatsorsuutigineqartoq Naalakkersuisut paasissutissiissutigaa. Tassa suliat eqqartuussivikkut suliassanngortinneqarnissaannut aningaasaliissuteqarnissap Aningaasaqarnermut Ataatsimiititaliamit akuersissutigineqaaqarneranit ukiut qulingiluat sinnerlugit qaangiuttut aatsaat suliat aallartinneqarnissaat naatsorsuutigineqarpoq (Suliaq nr. 02/01.36.02.06-04-mi Aningaasaqarnermut Ataatsimiititaliap 13. marts 2002-mi aalajangiinera naapertorlugu). Suliassanngortinneqartut taamatullu innuttaasut eqqarsaatigalugit tamanna naammaginangilluinnartutut oqaatigineqartariaqarpoq, tassa suliap piaarnerpaamik naammassineqarnissaata piumasaqaatiginissaanut illua tungeriit tungavissaqarmata. Suliamik eqqartuussivikkut ingerlatsinissami aallaqqaammulli siunertaavoq akisussaassutsimik inissinissaq anusinngorsaanissarluk. Taamaallunilu aamma aktiaateqarluni ingerlatseqatigiiffinni pisortanit pigineqartuni qullersatut siulersuisutullu sulinermik sumiginnaanerup aningaasaqarnikkut akissussaannermik nassataqarnera suliassanngortitsisut tungaanit immikkut erseqqissarusunneqarsimavoq. Suliaq kinguaattorfiugaluttuinnartillugu siunertaq taanna ersernerlussigaluttuinnarsinnaavoq. Taamaattumillu eqqartuussivimmi suliamik suliarinninnissaq 2010-mi aallartinneqarsinnaaqqullugu Naalakkersuisut pisariaqartunik iliuseqartariaqartut Aningaasaqarnermut Ataatsimiititaliaq isumaqarpoq. Tamatumani ilanngullugu pisariaqarpoq suliap tamatuma suliallu allat, inuiaqatigiinni eqqartuussiveqarnermik ingerlatsiffiusuni naammaginartutut isigineqarsinnaasoq qaangerlugu eqqartuussinissamut ukiuni arlalinni piffissaliiffigineqarsimanngitsut, ingerlanneqarnissaannut sulisutigut pisariaqartut atugassiissutigineqarnissaannik inatsisinik atortitsinermut ministereqarfimmut piaartumik Naalakkersuisut saaffiginninnissaat.

Demokraatit Aningaasaqarnermut Ataatsimiititaliap eqqarsaatigisimasai isumaqatigai, taamaammallu massakkorpiaq suliap sumut killissimanera paaserusullugu.

Naalakkersuisut akeqquneqarput ullut naliginnaasumik sulliviit qulit qaangiutsinnagit.